

Gunakan pendekatan bijaksana

KUALA LUMPUR 2 Ogos — Datuk Sri Dr. Mahathir Mohamad berharap ulama - ulama menggunakan pendekatan Islam dengan bijaksana untuk menyedar, menyatupadu dan membangunkan umat Islam di negara ini supaya mampu memelihara agama dan diri mereka.

Perdana Menteri berkata kebijaksanaan dalam menyebarkan ilmu, tutur kata, tindakan dan menaraif pimpinan merupakan antara pendekatan yang penting bagi menjamin keharmonian kehidupan bermasyarakat dan bernegara.

"Seseorang yang berilmu perlu menggunakan kebijaksanaannya supaya segala tindakannya berasaskan keperluan dan perkembangan semasa."

katanya ketika berucap merasmikan Majlis Ijtimak Guru-Guru Takmir Masjid seluruh negara di Pusat Islam di sini hari ini.

Ijtimak bertema "Ke arah mengembalikan kewibawaan guru-guru agama dalam mengawal aktiviti masyarakat", itu diadakan selama tiga hari bermula semalam dan dihadiri oleh 1,720 orang guru takmir masjid dari seluruh negara. Ia anjuran Bahagian Hal Ehwal Islam, Jabatan Perdana Menteri.

Beliau berkata terdapat segolongan masyarakat Islam di negara ini yang arif dan mempunyai kepakaran dalam sesuatu bidang ilmu pengetahuan, tetapi kurang arif menjalankan tugas yang diamanahkan.

Keadaan sedemikian telah menimbulkan pelbagai kesan negatif dalam kehidupan masyarakat, kata beliau dengan menegaskan, kegagalan menjalankan sesuatu tugas dengan bijaksana, cermat dan teliti menyebabkan pelaksanaan beberapa rancangan untuk kemajuan agama dan negara terbantut dan tidak mencapai objektifnya.

Di samping itu, kata Datuk Sri Dr. Mahathir, terdapat pihak tertentu yang mengambil kesempatan daripada keadaan yang berlaku untuk membuat pelbagai tafsiran dan telahan secara membuta-tuli yang mengelirukan umat Islam sehingga mereka gagal menghadapi cabaran hidup.

"Tindakan golongan ini sebenarnya memperlihatkan bahawa mereka telah gagal mengguna kebijaksanaan dalam menyelesaikan masalah yang dihadapi.

"Orang yang bijaksana ialah orang yang benar-benar mengenal pasti punca sesuatu masalah, bersedia membantu mengatasi dan mengurangkan masalah berkenaan dan bukan berbuat sebaliknya," kata Perdana Menteri.

Datuk Sri Dr. Mahathir berkata para ulama harus membelakangkan semua kepentingan lain dalam usaha mereka mengembalikan masyarakat Islam di Malaysia kepada ajaran Islam yang sebenarnya.

Beliau berkata para ulama sebagai golongan yang mempunyai kewibawaan dalam Islam, harus menjaga kekuatan kepimpinan Islam supaya Islam tidak terancam dengan kelemahan material atau rohaniah.

Beliau menggesa ulama yang tidak mempunyai kepentingan lain, selain daripada Islam menentukan kesahihan

LIHAT MUKA 2

Gunakan pendekatan bijaksana

dan kebenaran ajaran yang datang daripada pelbagai punca.

"Ajaran Islam yang sebenarnya ialah Islam seperti yang diterangkan dalam Al-Quran dan sunnah Nabi. Perbezaan yang terdapat sekarang ialah disebabkan oleh tafsiran yang berbeza-beza oleh tokoh - tokoh Islam tertentu," kata beliau.

Beliau berkata dengan penjelasan agama Islam sebenarnya, sebarang keraguan masyarakat akan hilang dan ini tidak dapat tidak akan menjadi

masyarakat Islam kukuh dan kuat, yang mampu melindungi umat Islam daripada bermacam tekanan dan pengaruh yang boleh melemahkan Islam dan negara mereka.

Perdana Menteri juga menggesa masyarakat berhati - hati dengan penerimaan orang yang berpengetahuan Islam sebagai ulama kerana menurutnya, seseorang itu tidak menjadi ulama, hanya kerana dia memiliki pengetahuan tentang agama Islam.

"Kajian perlu dibuat tentang ajaran yang disampaikan oleh seseorang itu, tentang kepentingannya dan amalan hidupnya sebelum seseorang itu diterima dan diiktiraf sebagai ulama."

Jika kajian seumpama itu tidak dibuat, katanya, ajaran - ajaran sesat dan berkepentingan, yang sudahpun terdapat di negara ini akan berkembang dengan lebih pesat lagi dan akhirnya umat Islam di Malaysia akan berpecah dan bermusuhan sesama sendiri.